

2 Joni

Joni Yidavakesi Pikarya' Pigasaalya'.

¹Kiraazitiyareraavi a'mwe naangeinyi (Joninnyi) pikariyikwia daza' yida'mwesi. A'mwe'ginyi Gotiyai githahilakake'ginyinaji gimire kaimiraayanginaji yida'mwesi. Nebulyavi kinakaavahirina nyivu'nadeinyi. Nabaai gaveinyi mi'. Aawa. Nebulya' yawirangadivita yuyara sariminyina tewaanya wivu'nivanikerera. ²Neminyi Kiraazitiyarine nebula sa' wilanewa'da nabaai yuyagaa' yuyagaa' neminyiji kuna wilanewa'devina sariminyina tewaanya nevu'nivanikeine. ³Gotiyai Nimwalyi Jizaazai Kiraazitiyai Nimware Gawaalisi yanga gaimwangebulyi kale'na gaimwangebulyi kwaamu'nanyabulyi kuna nejaayika! Nebulyaviji tewaanya wivu'nya'neviji sara neyika!

Nebulya'nebwinaji wivu'nya'nebwinajiya'nesi.

⁴Nimi yilaaya naanga yiweinyi. Nimwai kiwinya dinike' maakobaaibi' gimire kaimiraaya pimilika tewaanya nebulyabwi sara midimanigasa'nanyi. Sara wi'nadi yilaaya naanga yiweinyi. ⁵A'mwe'gi piri' diraginna githima! Kiwinya mudike' magithawasivanaabihe. Aawa. Sinnawi aayawidaa'nyi daza' maarosi. Kiwinya' dare' githima! Neminyi pwaina pwainavina nevu'nana! ⁶Kale ya sabwi darebulyi. Nemire Gotiyare kiwinya dinikengina midinaanneine! Sinnawi aayawidaa'nyi kiwinya daza' sarimi kadika wi'netabaaibi' kiwinya daresi. Kale ya saburi nayaa dimwaalyila! ⁷Sare' a'mwe kwalaalyara kwaasi yagaala widadivisara Kwaakevakina walyuna yeva jamarivanigava. Sahwara dara majalikurakivanigasare "Jizaazai Kiraazitiyai kilaa'nakei yima'naabikelyi." Sara majadivisare. A'mwe sasara dazai kwaasi dadelyi. Sai Kiraazitiyarine yikamaangelyi. ⁸Sare'na nayaa yawi'divi' mala nayaa jiwannyila! Sarimi mena nayaa yesavine tivikita mamaari nyipidika! Aawa. Divi sarimi tewaanyanna tivikita yuya dimaaryide'na

mala nayaa jiwannyila! ⁹Gazaizai Kiraazitiyare wijiwaakya' wavila'na yada wijiwaakya savi kuna mulamwaalyikei sahwai Gotiyai kininnakei mika! Wijiwaakya savi kuna wilamwaalikei sahwai Nimwalyi Gawaalisi saraai kininnakelyi. ¹⁰Pwai sariminyawinna bi'mavajai wijiwaakya sa' mamakabi yajari sarinnya angengi “Dulaama! Dava dimwaaideiginyi,” mudipina! “Yilaaya ja!” mudipina! ¹¹“Yilaaya ja!” widazai gamire wawinya kayaa'nanyangi nye'mwannamwaaladika!

Yagaala aaya'nesi.

¹²“Sariminyina yagaala kwalaalya widima!” dena kiri' “Pikariyikwiaji pikariyisarisi yihithavima!” majiwa. Aawa. Sariminyawinna yihwanganide'na wawa'muji sarimiji yagaala yuya dinaademilikane. “Yilaaya naanga yune'na yaana!” dadi dinaadesi.

¹³Ja'mwevi Gotiyai dahilakakevire kaimiraayamilika githivaniga' “A'mwe naange'gi!”

Joni